

乾隆杭州府志

杭州府志卷八十

人物 一名臣一

李洪憲稱浙人慕義自強黃東發稱杭州爲列郡冠冕靈
淑山川鍾生賢詰可不謂忠臣接踵孝子連閭者哉採史
傳之遺文旁及鄉國所記覈實書之名德相望蓋亦後先
輝映者矣條其子目曰名臣曰忠臣曰武功曰循吏曰孝
友曰義行曰文苑曰隱逸曰方技史家列傳每門有標目
始於魏澹書州縣志多因之非創也列女以闡幽隱而寓
賢仙釋並從附見焉

漢

孫瑜字仲異富陽人始以恭義校尉領兵時賓客諸將名
江西人瑜虛心綏拊得其歡心建安九年領丹陽太守爲
衆所附至萬餘人加綏遠將軍遷奮威將軍領郡如故立
學宮講肄是時諸將皆以軍務爲事而瑜好墳典雖在軍
旅誦聲不絕

吳志孫
靜傳

案孫瑜通志作吳人今從咸淳志作漢人於潛志載漢
何騰從皇甫規皇甫嵩有戰功官至太守自廬州渡江
居於潛其事不見載籍唯見何氏家譜恐不足據

三國吳

褚泰仕吳封臨平侯政寬刑簡惠澤及民後居錢塘爲郡

著姓歷六朝至唐代有顯者

咸淳志

晉

孫惠字德施富陽人永寧初赴齊王冏義討趙王倫以功封晉興縣侯辟大司馬戶曹掾轉東曹屬齊王驕矜僭侈惠諷以五難四不可勸令歸藩不納辭疾去成都王穎薦爲大將軍叅軍領奮威將軍白沙督是時穎將征長沙王父陸機爲前鋒都督惠與機鄉里憂其致禍勸機讓都督于王粹及機兄弟被戮惠甚傷恨之永興元年乘輿幸鄴東海王越舉兵下邳惠乃詭稱南岳逸士秦秘之以書干越勉以勤王康世之畧詞義甚美越省書以爲記室叅軍

專掌文疏與叅謀議除散騎郎太子中庶子復請補司空
從事中郎越誅周穆等夜召叅軍王廙造表廙戰懼壞數
紙不成時惠不在越嘆曰孫中郎在表久就矣越遷太傅
以惠爲軍諮祭酒轉彭城內史廣陵相遷廣武將軍安豐
內史以迎駕功封臨湘縣公卒

晉書
本傳

按咸淳志入吳今從晉書本傳

唐

褚亮字希明錢塘人其先自陽翟徙居焉亮幼聰敏好學
善屬文博覽無所不至年十八詣陳僕射徐陵陵與商榷
文章深異之後主聞而召見使賦詩江總及諸辭人在座

莫不稱善唐太宗聞亮名深加禮接與杜如晦等十八人爲文學館學士進授員外散騎常侍封陽翟縣男拜通直散騎常侍進爵爲侯致仕卒時年八十八

舊唐書本傳

按亮本傳錢唐人而馬氏舊志趙世安仁和志作仁和人攷唐時尚無仁和之名應從正史

褚璆字伯玉遂良曾孫擢進士第累拜監察御史裏行先天中突厥圍北庭詔璆持節監督諸將破之遷侍御史拜禮部員外郎而氣象凝挺不減在臺時

舊唐書本傳

吳越國

元德昭字明遠本姓危撫州南城人父仔倡信州刺史爲

淮南兵所逐奔于杭武肅王待以賓禮惡危姓因曰元氏
德昭起家鎮東節度巡官錢塘令累授睦州軍事判官知
台州新亭監文穆王襲國林鼎以德昭薦遂命掌文翰機
密事及事忠遜王用師南閩兵畧要務悉委德昭拜丞相
忠懿王立恩遇彌至顯德二年常州之役吳程執趙仁澤
送西府德昭力救曰此強圉練宥之足以勸忠得不死六
年偕吳延福入貢于周專對稱旨禮待有加德昭厚重多
謀臨事尤能果斷每屬國政議者盈廷德昭至則他論皆
息軍中有不循法度者以禮諭之無不服胡進思迎忠懿
王于邸第德昭立簾下不拜進思亟出褰簾乃拜其遇變

得大體如此德昭處家以孝友聞當時序置酒環列几席間者凡四從遂咏滿堂羅綺四代兒孫之句以志喜焉及卧疾先自爲埋文治後事卒贈太保諡貞正

十國春秋

按元氏自仔倡奔杭遂世居其地攷宋史元絳傳絳爲德昭孫知其世爲錢塘人

錢億字延世文穆王元瓘子倣之弟歷事佐倣晉開運三年佐欲鑄鐵錢以益將士祿億諫曰鑄錢有八害新錢旣行舊錢皆流入鄰國一也可用于吾國而不可用于他國則商賈不行百貨不通二也銅禁至嚴民猶盜鑄况家有鎔釜野有鑄犁犯法必多三也閩人鑄鐵錢而亂亡不足

爲法四也國用幸豐自示空乏五也祿賜有常無故益之以啟無厭之心六也法變而弊不可遽復七也錢者國姓易之不祥八也事乃止後相俶以疑謗出判明州有善政凡科索舊制悉除之顯德中俶命括民丁以益軍旅勞擾頗多億手疏切諫俶悟遂寢其事俶嘗與丞相以下論時務言民之勞逸由時君奢儉因爲詩二章命億廣和億因作詩以寓諷刺俶嘉歎仍賜詩以美其意卒年二十九諡

忠獻

嘉靖臨安縣志

宋

楊覃字申錫曾祖承休使吳越道阻留浙中覃少獻書于

錢俶署著作佐郎從俶歸朝爲禹城尉太平興國八年舉進士授徐州觀察推官知戎州遷太常博士覃本名蟬至是太宗改焉淳化中轉屯田員外同判壽州巡撫使潘慎修上其政績詔嘉獎命知州事數月召還會丁內艱州民列狀乞留轉運使以聞有詔奪情時田重進爲永興節度選覃與林特同判軍府事賜覃緋魚重進不法覃多抗執求徙任不許轉都官員外遷屯田郎中呂蒙正薦其材詔入判三司磨勘憑由理欠司四年春旱覃上言獄繫甚繁望詔有司死罪未得論決俟雨降乃復常典仍望自今凡決重刑日依唐故事勅減膳徹樂管獻時務策五篇一曰

禦戎二日用兵三日爲政四日選賢五日刑罰明年權同
知貢舉出爲陝西轉運使賜金紫會邊臣言李繼遷死願
乘時深入覃建議伐喪非禮且其子尚在當爲之備俟其
衆叛親離亡無日矣西鄙屯兵調役甚繁副使朱台符務
有爲而覃務循舊且言邊事不宜更張徙知隨州移唐州
景德二年召歸屬河北兵革之後命覃巡撫賑給之出知
潭州王師討宜賊軍需多出長沙曹利用以聞詔褒勞加
刑部郎中大中祥符二年代馮亮爲淮南江浙荆湖制置
發運使月餘改太常少卿直昭文館知廣州覃勤于吏事
南海有蕃舶之利前後牧守或致謗議惟覃以廉著遠人

便之加右諫議大夫四年卒

宋史本傳

錢惟演字希聖吳越王俶之子從俶歸朝爲右屯衛將軍改太僕少卿獻咸平聖政錄命直秘閣預修冊府元龜累遷兵部尚書拜樞密使罷爲保大軍節度知河陽加同平章事判許州鎮武勝泰寧崇信節度使卒再改謚文僖

宋史

本傳惟演出于勲貴文章清麗于書無不讀嘗曰學士備顧問不可不該博故其家聚書侔于秘府

兩浙名賢錄

楊大雅字子正高祖承休唐天祐初以尚書刑部員外郎爲吳越國冊禮副使江淮道阻遂家錢塘大雅好學日誦數萬言進士及第歷新息鄢陵縣主簿改光祿丞知新昌

縣遷秘書丞咸平中交趾獻犀因奏賦召試遷太常博士久之又上書自薦獻所爲文復召試直集賢院出知筠袁二州提點淮南刑獄還考試國子監生坐失薦迭降監陳州酒徙知常州遷集賢殿修撰知應天府還糾察在京刑獄以兵部郎中知制誥大雅初名侃至是避真宗藩邸諱詔改之拜右諫議知亳州卒大雅朴學自信無所阿附直集賢院二十五年不遷出其後者多致榮顯或笑其違世自守大雅嘆曰吾不學乎世而學乎聖人由是以至此吾之所有不敢以薦于人而嘗自獻乎天子矣

宋史本傳

盛度字公量世居應天府後徙杭州餘杭縣舉進士補濟

陰尉累遷屯田員外契丹寇邊從幸大名數上疏論邊事
奉使陝西因覽疆域參質漢唐故地繪爲西域圖以獻改
起居舍人知制誥嘗奏事便殿真宗問所上西域圖度言
酒泉張掖武威燉煌金城五郡之東南自秦築長城西起
臨洮東至遼碣延袤萬里有郡有軍有守捉襟帶相屬烽
火相望其爲形勢備禦之道至矣唐始置節度後以宰相
兼領用非其人故有河山之險而不能固有甲兵之利而
不能禦今復繪山川道路壁壘區聚爲河西隴右圖願備
上覽真宗稱其博學遷右諫議大夫入翰林爲學士加史
館修撰歷太常少卿知筠州更虔滁蘇三州還知審刑院

知揚州加集賢院學士初度請復賢良方正科又請建四
科以取士既用夏竦議置六科其議亦自度始遷給事中
受詔與御史中丞王隨議通解鹽聽商旅入錢筭鹽後遂
爲定制尋進禮部侍郎兼端明殿學士召問邊計退條十
事上之兼侍讀學士景祐二年參知政事遷知樞密院拜
武寧軍節度坐令開封府吏馮士元強取其鄰所賃官舍
以尚書右丞罷復知揚州加資政殿學士知應天府暴威
風眩以太子少傅致仕卒贈太子太保諡文肅

宋史本傳

謝絳字希深富陽人舉進士甲科知汝陰縣薦擢秘閣校
理出通判常州天聖中天下水旱蝗起河決滑州絳上疏

請下詔引咎罷役省歛休息天下仁宗嘉納之遷祠部員外郎通判河南府雖在外猶數論事再遷兵部員外郎請罷內降凡詔令皆由中書樞密然後施行擢知制誥判吏部流內銓出知鄧州按召信臣六門堰故迹請復修之未

就而卒

宋史本傳

錢景謏惟演從孫中進士第初王安石得其文旣薦送之又推譽公卿間因就弟子禮執喪居許聞安石得政因事來京師謁之間曰青苗助役如何景謏曰利少害多又問孰可用曰居喪不交人事而知人尤難事也遂辭出後調官復來安石令先與弟安國見安國謂曰相君欲以館閣

相處而任以事景謚曰百事皆可爲所不知者新書役法耳及見安石欲令治峽路役書且以戎瀘蠻事景謚曰峽路民情僕固不能知而戎瀘用兵所繫尤重願擇知兵愛人者安石大怒座上客皆爲之懼景謚退曰自古以來好利者衆而顧義者寡故天下萬事皆由人而不在于已苟爲利所動而由于人則盜亦可爲也遂與安石絕終身爲

外官僅至朝請郎而卒

宋史附傳

李用和字審禮杭人章懿皇太后弟少窮困居京師劉美求用和于民間奏爲三班奉職累遷兵馬都監賀州刺史太后改葬于永安領捧日天武兵護梓官授寧州刺史歷

遷永清軍節度留後改定州路舊制刺史以上所賜公使錢得私入而用和悉用爲軍費歷彰信軍節度同中書門下平章事景靈宮使以疾告仁宗臨問賜銀飾肩輿進兼侍中卒贈太師中書令隴西郡王諡恭僖初仁宗以太后不逮養故外家褒寵特厚用和列位將相能小心靜默推遠權勢論者以此稱之

宋史外傳

李璋字公明用和子補三班借職積官爲天平軍節度觀察留後知澶州護塞商胡會河漲訛言水且至璋據廳事自若人心乃安河亦不溢徙曹州觀察累遷武勝軍節度殿前都指揮仁宗書忠孝李璋字并秘書賜之宴近臣羣

玉殿酒半命大盞二飲韓琦及璋如有所屬帝崩執政欲
增京城甲士璋曰例出累代不宜輒易時近衛相告乾興
故事內給食物中有金旣而果賜食衆視食中璋曰天子
未臨政已優賞汝何功復云云敢喧者斬衆乃定以武成
軍節度知鄆州京東盜白日殺縣令掠人道中璋信賞罰
擒捕盜爲衰止歲大雨水競以缸筏邀利多溺死璋一切
籍之約所勝載如黃河法發卒城州西關調夫修路數十
里夾道植柳人指爲李公柳知鄧州坐失舉改節振武軍
知郢州還朝道卒贈太尉諡良惠

宋史
附傳

沈括字存中錢塘人以父任爲沭陽主簿縣依沭水乃職

方氏所書浸曰沂沭者故跡漫爲汙澤括新其二坊疏水爲百渠九堰以播節原委得上田七千頃擢進士第爲館閣校勘刪定三司條例故事三歲郊丘之制有司按籍而行藏其副吏沿以干利壇下張幔距城數里爲園囿植采木刻鳥獸綿絡其間類非齋祠所宜乘輿一器而百工侍役者六七十輩括考禮沿革爲書曰南郊式卽詔令點檢事務執新式從事所省萬計神宗稱善遷太子中允提舉司天監括始置渾儀景表五壺浮漏招衛朴造新歷募天下上太史占書雜用士人分方技科爲五後皆施用淮南飢遣括察訪發常平錢粟疏溝瀆治廢田以救水患遷集

賢校理察訪兩浙農田水利遷太常丞時大籍民車人未
諭縣官意相挺爲憂又市易司患蜀鹽之不禁欲盡實私
井而輦解池鹽給之言者論二事如織皆不省括爲帝剴
切言之二事俱寢擢知制誥爲河北西路察訪使時賦近
畿戶出馬備邊民以爲病括言北地多馬而人習騎戰猶
中國之工强弩也今舍我之長技强所不能何以取勝又
邊人習兵唯以挽强定最而未必能貫革謂宜以射遠入
堅爲法如是者三十一事詔皆可之遼蕭禧來理河東黃
嵬地留館不肯辭曰必得請而後反帝遣括往聘括詣樞
密院閱故牘得頃歲所議疆地書指古長城爲境今所爭

蓋三十里遠表論之帝以休日開天章閣召對喜曰大臣
殊不究本末幾誤國事命以畫圖示禧禧議始屈賜括白
金千兩使行至契丹庭契丹相楊益戒來就議括得地訟
之籍數十預使吏士誦之益戒有所問則顧吏舉以荅他
日復問亦如之益戒無以應漫曰數里之地不忍而輕絕
好乎括曰師直爲壯曲爲老今北朝棄先君之大信以威
用其民非我朝之不利也凡六會契丹知不可奪遂舍黃
嵬而以大池請括乃還在道圖其山川險易迂直風俗純
龐人情向背爲使契丹圖抄上之拜翰林學士權三司使
知宣州召知審官院又出知延州至鎮悉以別賜錢爲酒

命屬市良家子馳射角勝有軼羣之能者自起酌酒勞之
邊人驩激執弓傳矢唯恐不得進越歲得徹札超乘者千
餘皆補中軍義從威聲雄他府以副總管种諤西討功加
龍圖閣學士朝廷出宿衛之師來戍賞賚至再而不及鎮
兵括以爲衛兵雖重而無歲不戰者鎮兵也不均若是且
召亂乃藏勅書矯制賜緡錢數萬以驛聞詔報之曰此右
府頒行之失非卿察事機必擾軍政自是事不暇請者皆
專之諤師次五原值大雪餉不繼殿直劉歸仁率衆南奔
士卒二萬人皆潰入塞居民怖駭括出東郊餞河東歸師
得奔者數千問曰副都總管遣汝歸取糧主者爲何人曰

在後卽諭令各歸屯及暮至者八百未旬日潰卒盡還括
出按兵歸仁至括曰汝歸取糧何以不持軍符歸仁不能
對斬以徇經數日帝使內侍劉惟簡來詰叛者具以對大
將景思誼曲珍拔夏人磨崖葭蘆浮圖城括議築石堡以
臨西夏而給事中徐禧來禧欲先城永樂詔禧護諸將往
築命括移府並塞以濟軍用已而禧敗沒括以夏人襲綏
德先往救之不能援永樂坐謫均州團練副使元祐初徙
秀州繼以光祿少卿分司居潤八年卒

宋史
本傳

錢藻字醇老惟演之從孫也幼孤刻勵爲學第進士又中
賢良方正科爲秘閣校理慈聖后臨朝藻三上書乞還政

同修起居注知制誥加樞密直學士知開封府平居樂易
無崖岸而居官獨立守繩墨爲政簡靜有條理不肯徇私
取顯數求退改翰林侍讀學士知審官東院卒神宗知其
貧賻錢五十萬贈太中大夫

宋史
附傳

虞策字經臣錢塘人登進士第調台州推官知烏程縣通
判蘄州王安禮李常薦之擢湖南轉運判官元祐五年召
爲監察御史進右正言數上書論事哲宗納后上正始要
言遷左司諫以龍圖閣待制知青州改杭州過闕留爲戶
部侍郎歷刑部戶部尚書拜樞密直學士知永興軍成都
府入爲吏部尚書加龍圖閣學士知潤州卒于道

宋史
本傳

虞奕字純臣策之弟舉進士崇寧中提舉河北西路常平
洛相饑徙之東路入對徽宗問行期對曰臣退卽行流民
不以時還則來歲耕桑皆廢矣帝悅旣而西部盜起時將
遣兵逐捕奕條上方畧悉降之擢監察御史陽武民傭于
富家其室美富子欲私之弗得怒殺之而賂其夫事覺府
縣及大理鬻獄奕受詔鞠訊皆伏辜提點河北刑獄自何
承矩創邊地爲塘濠有定界旣中貴人典領以屯田開拓
爲功肆侵民田民上訴屢出使者按治皆不敢與直奕曲
折上之疏其五不可詔罷屯田加直秘閣淮南轉運副使
入爲開封少尹遷光祿卿戶部侍郎睦州亂以龍圖閣直

學士知鎮江府冠平論勞增兩秩還爲戶部內侍總領內
藏予奪專已奕白宰相詔罷內侍而徙奕工部襲慶守張
滌使郡人詣闕請登封東平守王靚諫以京東歲凶多盜
不當請封爲政者將罪靚奕言靚憂民愛君所當獎激奈
何用爲罪乎靚獲免未幾卒贈龍圖閣學士

宋史
附傳

孫蕃字叔靜錢塘人用父任調武平尉歷福建轉運判官
召爲屯田員外蕃微時與蔡京善至是京還朝遇諸塗京
逆謂曰我若用于天子願助我蕃曰公誠能謹守祖宗之
法以正論輔人主示節儉以先百吏而絕口不言兵天下
幸甚蕃何爲者京默然既相出提點江東刑獄未幾入爲

少府少監戶部郎中縣官用度無藝罄疏論之當國者不樂徙開封遷太僕卿殿中少監知曹州徙鄆州邑人子爲草祭之謠指切蔡京罄以聞京怒使言者誣以他謗提舉鴻慶宮起知單州遂致仕卒諡通靖

宋史本傳

李鞬字彥淵富陽人崇寧二年登進士第宣和初提舉廣東市舶居官廉直珍貨一無所取商舶輻輳召回盜邀之于途及舡篋隨行書帙而已盜亦歛衽退紹興間商舶以鞬清直聞于朝除比部郎尋遷吏部秦檜欲以子與鞬女爲婚鞬却之遷將作監檜屢遣子就學鞬曰吾爲天子卿監豈爲宰相教子遂丐外持憲閩部易江東旣忤權臣累

奉祠不復榮望

廣東通志

何鑄字伯壽餘杭人政和五年進士歷官州縣廖剛薦鑄
搯履勁正可備拾遺補闕之選卽命對鑄首陳動天之德
莫大于孝感物之道莫過于誠帝嘉納之拜監察御史遷
侍御史上疏論士大夫心術不正乞大明好惡申飭中外
毋或欺誕時遷温州諸宮殿神像于湖州有司迎奉所過
騷然鑄言孝莫大于寧神寧神莫大于得四海之歡心浙
東旱荒若加勤動恐道路怨咨乞務從簡約不得騷擾疏
奏其事遂已擢右諫議大夫拜御史中丞先是秦檜主和
岳飛有戰功檜惡異已欲除之脇飛故將王貴上變逮飛

大理獄命鑄鞠之飛袒示背涅盡忠報國四大字深入膚
理鑄察其寃白之檜檜不悅曰此上意也鑄曰鑄豈區區
爲一岳飛者強敵未滅無故戮大將失士卒心非社稷之
長計檜語塞改命万俟卨飛死獄中檜銜鑄遣使金爲報
謝使鑄曰是行猶顏真卿使李希烈也然君命不可辭旣
返命檜諷万俟卨論鑄私岳飛欲竄嶺表帝不從止謫徽
州再遣使金歸報將大用力辭除資政殿學士知徽州提
舉江州興國宮卒年六十有五鑄孝友廉儉旣貴無居止
寓佛寺其辨岳飛之寃亦人所難然紹興己未以後徧歷
臺諫所論如趙鼎李光周葵范冲孫近諸人未免迎望風

旨議者少之鑄死四十餘年謚通惠其家辭焉嘉定初改

謚恭敏

宋史本傳

凌景夏字季文餘杭人紹興二年對策第二擢秘書省正字遷著作佐郎與胡瑄朱松張廣常明范如圭等六人共奏封事言和議非便秦檜憾之斥知外郡閒居十餘年檜死除起居舍人未幾直龍圖閣知鼎州奏免程昌禹所增蔡州官兵衣糧六萬四千餘緡詔減四分之一除吏部侍郎奏論吏部七司有法有例法可按籍而視例則散于案牘之中匿于吏胥之手官有去來不能遽知臣愚以爲吏部七司宜置例冊凡經取旨或堂白者每一事已命郎官

畫時擬定長貳書之于冊以爲例每半年上于尚書用印給下如此則前後予決悉在有司之目猾吏無所措巧詔

吏部措置中省

咸淳志

趙汝談字履常登淳熙十一年進士第調汀州教授佐丞相趙汝愚定大策汝愚欲驟以詞掖處之力辭去罹黨禍斥去後復召爲大社令時韓侂冑用事熾甚汝談痛憤登壇讀祝大呼侂冑及陳自強名自強不能堪以參知政事李壁薦召試擢正字改知無爲軍稱循吏獻料敵備邊二策歷湖北江西提舉常平寧宗崩哀痛得疾端平初以禮部郎官召對言倚用老成廣集忠智願加聖心又言大佞似

忠大奸似聖擢任之始未見甚失乃寢至差謫則是非邪
正易位而黜陟予奪失中多矣改秘書少監時集議出師
汝談反覆言不可輕戰而和尤非計旣而三京收復雖前
言用兵不便者亦喜汝談獨有憂色未幾洛師敗朝論始
服其先見遷宗正少卿權吏部侍郎陞侍讀朝議履畝稱
楮汝談言非便迂時宰意京師軍變宰相乞貶秩汝談持
不可草答詔以爲貶秩易審舉措難宰相滋不悅以言去
起知婺州召權禮部侍郎登對首疏言邊而無可倚仗乞
超越拘攣簡拔俊傑使各分方面巴蜀一人荆襄一人兩
淮各一人一切便宜行事不復更從中御庶幾伸縮由已

機用出心且曰臣之此策行于開禧未用兵之前決不至
罹今日之患其論楮法尤中時弊上稱歎久之以老祈免
改侍講權給事中權刑部尚書及卒轉兩官遺表上又轉
四官

宋史
本傳

按汝談史缺系籍考咸淳志云太宗八世孫居餘杭嘉
熙元年卒景定四年諡文懿可補宋史之闕

王沆字元廣建炎初以大父稟死節太原由青州銅川召
詣行在襲封安化郡王賜第鹽官名其里爲安化坊子恕
登隆興元年進士沆居王位絕苞苴杜佞倖屏聲色奇玩
不御日延集儒生研討墳典比入覲卽策蹇行不以郵給

煩縣官裳舄不做甚不易所得賜賚甚渥悉貯以給軍需
時丁播遷矢志恢復嘗因召見問政事對曰民惟邦本治
民須寬寬則民悅而本固兵以征伐治兵須嚴嚴則兵肅
有備無患中興之要不出于此沅居邑鑿備河洩潮勢有

功于民社焉

海寧
州志

趙汝讜字蹈中汝談弟蔭補承務郎韓侂冑逐趙汝愚汝
讜上書乞留汝愚斬侂冑坐是廢居者十年登嘉定元年
進士除太社令累遷湖南提舉常平知温州卒

咸淳
志

按省志讜作謫今從宋史

俞烈字若晦臨安人淳熙八年試禮部第一嘉定初知慶

元府鎮以清靜移知鎮江時淮民流移充斥多方拯救郡
有大來岡小夾岡乃漕運路雨餘泥深牽夫失足輒墮數
十尺下烈爲斃之始無陷溺權吏部侍郎乞濬練湖通漕
廣溉兼中書舍人勲戚濫恩貂璫佚罰官掖賫緣干請多
格不行尋兼侍讀卒

咸淳志

章之光字忠臺其先閩之浦城人祖仲達任秀州判官以
忤當道去慶元中籍鹽官中進士由殿中侍御史除兵部
侍郎寧宗嘗手詔稱之休澣之日關園曰鳳梧卽率子弟
講孝悌二子長彥文居邑中次彥武遷會稽

海寧州志

趙希綰字君錫舊名希喆登慶元二年進士第改賜今名

少扶父喪歸道遇寇左右駭散希館拊棺慟哭不懾寇義而去學于陳傳良徐誼既舉進士調汀州司戶峒寇李元礪方起汀人震懼郡會僚佐議守城希館無一語守異之曰不言得無有所見乎希館曰守城非策距城三十里有關曰古城若悉精銳以扼其衝賊不足慮矣守以付希館人爲危之希館嚴兵以待賊且至始命矢石俱下賊無一免餘黨聞風遁事聞陞州推官治疑獄決滯訟攝下邑弭亂卒去之日泣送者數十里調主管夔州路轉運司帳司疏大寧鹽井利病使者上諸朝民便之改知玉山縣未行召對首言民力困于貪吏軍力困于僨帥國家之力外困

于歸附之卒內困于浮冗之費寧宗嘉納之授大理寺丞
遷大宗正丞權工部郎官廷臣言宗姓人舉進士請視朝
士聽輪對希館首論今日多事之際而未有辦事之人朝
紳清選也以緘默爲清重以刻薄爲舉職以無所可否爲
識體聞寄重任也以大言爲有志以使過爲知恩臣非敢
厚誣天下以爲無人患在選擇未得其道器使未當其才
爾授成州團練使進和州防禦使理宗卽位進潭州觀察
使又進安德軍承宣使希館引對言初政急務莫先于明
道總治統收人心上爲動容明年論祠祭不蠲禁衛不肅
慈明宮上壽陞節度封信安郡公卒

宋史本傳

李宗勉字疆父富陽人開禧元年進士歷遷著作郎入對
言邊事明年兼權兵部郎官李全叛謀已露人莫敢言宗
勉獨累疏及之拜監察御史時方謀出師汴洛宗勉言願
詔大臣愛日力以修內治合人謀以嚴邊防節冗費以裕
邦財招強勇以壯國勢仍飭沿邊將帥毋好虛名而受實
害已而各師潰又言何地可控扼何兵可調遣何將可捍
禦何糧可給餉皆當預作措置拜殿中侍御史詔條陳邊
事宗勉奏請分上流淮東淮西爲三帥而以江淮大帥總
之以公私之財分給四處俾之招募充補仍選沿流諸郡
將士爲扞禦之圖或謂其勢強盛宜于講和欲出金緡以

奉之是抱薪救火空國與敵矣擢諫議大夫進簽書樞密院事史嵩之開督府力主和議宗勉言嵩之職在督戰若所主在和必至虛捐歲月坐失事功進叅知政事拜左丞相兼樞密使守法度抑僥倖不私親黨召用老成尤樂聞讜言以觀文殿大學士致仕卒贈少師謚文清

宋史本傳

趙與權字悅道燕懿王八世孫嘉定七年進士調會稽尉改建寧司戶叅軍中明法科攝浦城縣丁父憂作善慶五規示子孫免喪遷大理評事轉對言天變民情國威三事久之以直寶章閣知安吉州郡計仰推醋禁網峻密與權首捐以予民設銅鉦縣門欲愬者擊之寃無不直有富民

愬幼子察非本心姑逮其子付獄徐廉之乃二兄強其父析業與權曉以法諭以天理皆感悟又嫠嫗僅一子亦以不孝告留之郡廳曰爲饌俾親饋晨昏以禮未周月母子如初二家皆畫像事之喪母朝廷屢起之不可乞終禪趨朝權戶部侍郎知臨安府嘉熙間召見便殿具言防邊之道其後多見施行與權招刺三千人爲忠毅軍又言禁衛虛籍及京口諸郡悉宜募兵統以郡將財先贍軍餘始上供乞省不急之費薦文武四十人遷戶部侍郎權兵部尚書論邊事至爲深切且言人才國用民力兵威願乘此機加意根本勿徒困精神于除授老歲月于行移委公道于

私情付事功于無可奈何也遷吏部尚書力求歸田會潮
汝鰲堤留治之授端明殿學士知臨安府隄竣提舉萬壽
觀兼侍讀實錄院修撰奉朝請出關遣使趣還會饑民相
攜溺死仍知臨安府甘雨隨至米商來集流移至者有以
濟之力求納祿投資政殿學士進春秋解陞大學士薦士
六十人史嵩之將復入相而人言不已帝以問與權言嵩
之老師費財私暱貪富過立名譽必不宜復用又請以兵
財分任輔臣在講筵言以壞證付庸醫僅支殘息徒運巧
心天下事尚堪再悞耶時相忌之授安德軍節度使開府
儀同三司萬壽觀使日食應詔言事益切月賜內帑辭不

取帝書安貧樂道植節秉忠字賜之帝遂二諫臣與權力爭之五乞免朝奉三乞致仕俱不允賜泰卦詩忠邪辨拜

少傅卒進封奉化郡王累贈太師謚清敏

宋史本傳

洪咨夔字舜俞於潛人嘉定二年進士應博學宏詞科崔與之辟置幕府尋知龍州州歲貢麋金率科鑛戶咨夔曰將奉上乃厲民乎出官錢市之江油之民歲戍邊復苦運餉爲請于漕司免之毀鄧艾祠祠諸葛亮還朝爲秘書郎會詔求直言慨然曰吾可以盡言悟主矣其父見疏曰吾能喫茄子飯汝無憂史彌遠讀至濟王之死非陛下本心大恚擲于地轉考功員外郎轉對復言李全必爲國患臺

諫李知孝梁成大交論鑄二秩讀書故山七年而彌遠死以禮部員外郎召入見帝問今日急務對以進君子而退小人開誠心而布公道問在外人物對以崔與之真德秀魏了翁翌日拜監察御史咨夔感激知遇極論時事擢殿中侍御史會王定入臺察力詆蔣重珍咨夔乃按定疾視善良越三日左遷定而擢咨夔中書舍人權吏部侍郎與真德秀同知貢舉兼直學士院時咨夔病久帝勉留之上在位踰一紀國本未立未有敢深言之者咨夔乞擇宗室子養之併爲濟王立後擢給事中史嵩之入相進刑部尚書求去益力加端明殿學士卒御筆咨夔鯁亮忠懇有助

新政與執政恩例特贈兩官

宋史本傳

章鑑字君寶昌化人嘉定十六年進士調温州永嘉簿歷官國子司業兼侍講進太府卿以言免歸端平更化首上封事復召爲講官兼掌內外制時相專政極論其蠹國且乞罷職嘗上疏言進人不可太銳聽言不可不察擢兵部侍郎兼給事中華文閣待制以疾丐歸卒鑑爲人忠直淳厚事有切于時者必爲精言之時相疾其正論每怵以禍福鑑不爲動深爲理宗所知特見親禮

兩浙名賢錄

趙景緯字德父於潛人淳祐元年進士授江陰教授丁母憂以祿不逮養服闋不調景定元年特授秘書郎知台州

以化民成俗爲先務建黃巖縣社倉六十有六浚河道九
十里築隄路三十里節浮費爲下民代輸秋苗奏捐五邑
坊河渡錢進考功郎官兼崇政殿說書論監司守令曰與
其糾劾于有罪之後而未必盡得其情孰若精擇于未用
之先而使之各稱其職彗出于柳應詔上封事曰願陛下
損內帑以絕壅利之謗出嬪嬙以節用度之奢弄權之貂
寺屏之毒民之恩澤俟黜之擇忠鯁敢言之士置臺諫選
慈惠忠信之人爲守宰又必稽乾淳以來凡利源名窠之
在百司庶府者悉隸其舊公田派買不均之弊聽民自陳
隨宜通變咸淳元年拜宗正少卿兼權中書舍人以禮記

進講開陳敬恕之義封還濫恩詞頭帝從之雷發非時又
言內批疊降而名器輕宮闈不嚴而主威蕩橫恩之濫已
收而復出戢貪之詔方嚴而隨弛命令不疑則陽縱而不
收主意不堅則陰閉而不密陛下可不思致災之由而亟
正之哉進權禮部侍郎顯文閣待制卒謚文安

宋史本傳

洪勲字伯魯容夔長子登淳祐四年進士第少爲崔與之
魏了翁所知仕至兵部尚書嘗爲詞臣發明先皇與子之
意人稱其有父氣骨卒贈端明殿學士謚文清

咸淳志

杭州府志卷八十一

人物 一名臣二

元

葉李字太白杭州人補京學生宋景定間伏闕上書攻賈似道被竄漳州宋亡歸隱富春山至元中召見詢以治道李歷陳古帝王得失成敗之由世祖首肯時各道儒司悉罷李因奏各道儒學提舉及郡教授實風化所係請復立提舉司專提調學官課諸生講明治道而上其成者于太學以備錄用凡儒戶徭役乞一切蠲免可其奏累擢尚書左丞始定至元鈔法又請立太學薦周砥等十人爲祭酒

等官帝皆從之世祖欲徙江南宋宗室大姓于北方李言
宋民無故聞徙必將疑懼萬一奸人乘釁而起非國之利
事遂寢陞平章政事李固辭許之以疾得請南還卒追封

南陽郡公謚文簡

元史本傳

明

胡正錢塘人洪武八年由御史授陝西按察司經歷十二
年陞江西按察司僉事涖政嚴明獄無留滯是年入爲刑
部郎中十四年陞本部尚書歿之日家無餘資惟藏書數

千卷

錢塘縣志

沈縉字尚賢錢塘人洪武乙丑進士授工部屯田主事勤

于庶務以明敏稱後官至兵部左侍郎

錢塘縣志

方賓錢塘人洪武時由太學生試兵部郎中建文中署應天府事坐罪戍廣東以茹瑺薦召復官成祖入京師賓與侍郎劉儁等迎附特見委用進兵部侍郎四年儁以尚書出征黎利賓理部事有幹才應務不滯性警敏能揣上意見知於帝七年進尚書扈從北京兼掌行在吏部事明年從北征與學士胡廣金幼孜楊榮侍郎金純並與機密自後帝北巡賓輒扈從十九年議親征尚書夏原吉吳中呂震與賓共議宜且休兵養民未奏會帝召賓賓言糧餉不足召原吉亦以不給對帝怒遣原吉視糧開平旋召還下

獄賓方提調靈濟宮中使進香至語賓以帝怒賓懼自縊

死

明史本傳

仕有能聲爲一時名臣宣德改元官其子侗鴻臚

寺丞

錢塘縣志

蔣驥字良夫錢塘人弱冠領鄉薦中建文庚辰科進士授行人累官翰林院檢討司直進侍讀侍講學士與脩太祖成祖仁宗實錄及永樂大典等書多所裁定方其在史館時嘗得罪下獄十年乃得釋終禮部侍郎宣德中賜葬賜金倍常數皆異恩也

錢塘縣志

按錢塘縣志作洪武庚辰進士攷登科錄洪武無庚辰乃建文二年也此因前明革去建文年號舊志相沿今

更正

褚讓字克卿仁和人永樂甲申進士授禮部主事歷吏部員外清介持正遇人饋遺輒厲聲曰若謂天下無關西漢子耶凡權貴造請一槩峻絕當事不能平出爲山西叅政

未幾乞閒卒于家

萬歷舊志

潘中字大本錢塘人永樂甲申進士授楚府伴讀骨鯁負氣不依阿詭隨同列皆敬憚之一官三十年以直齟齬終無變屈旣歸家法嚴整閨門之內肅如也

錢塘縣志

沈升字志行海寧人永樂甲申進士選庶吉士預脩五經四書性理大全諸書上以刑罰不清召升等十二人皆授

刑部主事宣德中嘗參贊薊鎮軍務時太監劉通鎮守防
邊縱使爲惡公私苦之峻刑馭下使不敢言更私造兵器
擅調益官軍其志叵測言者咋舌升卽密疏其事不報遂
極言其不法事皆有據且曰今不預制恐後有不勝之患
宣廟悟召之還賜升金幣尋陞太僕少卿好獎拔士類凡
文武才可用者亟以聞後皆不負所舉人服其鑒海寧舊志
趙新字日新富陽人永樂初由國子生授工部主事擢吏
部郎中晉吏部右侍郎巡撫江西綜核吏治使百司無廢
務至以漕淮之舟運西江之粟兵農兩利民甚便之官至

吏部尚書

江西通志

徐昂字仲規錢塘人永樂初由舉人授兵部司務陞刑部員外郎昂以廉隅自守有武士謝君者暮夜懷金來饋昂堅却之謝慚退無何昂致仕還過姑蘇病卒貧無以殮謝聞之爲具棺衾人謂昂介特謝長者清節高義兩無愧云

舊志

吳登錢塘人永樂初以文學薦擢給事中小心鎮密受印文廟日侍宸翰退朝不交妻子一言近親至經歲不相接

上益信之終鴻臚寺丞

錢塘縣志

王榮字希仁錢塘人永樂中以乙榜進士授全椒學訓導陞淮府左長史至宣德朝歷官太僕寺卿致仕榮天才快

敏數千言立就有西漢氣骨立朝五十餘年聲實並著

舊志

徐琦字良玉先世錢塘人其祖謫戍寧夏遂家焉幼力學

經史永樂十三年舉進士授行人遷兵部職方員外郎明

敏有斷居官務持大體

明史本傳

宣德間黎利倡亂廷臣議撫

之擇庶僚有才望者以行擢琦行在右通政持節往諭既

至利拜命畢遣人議相見禮琦曰吾奉上命至爾首盡禮

使者卽所以尊朝廷爾何庸議利聞卽趨拜坐下所餽悉

拒不受還遷兵部右侍郎未幾上復命琦賫勅問黎利往

年抗師之罪并定歲貢常例至則利死利子麟蓄疑未服

琦宣布朝廷威德曉以禮義示以禍福一國竦聽無不帖

服由是麟感戴上恩乃鑄金人一以代躬謝仍備方物遣陪臣以進闕廷上大悅宴賚特厚遂命落琦戍籍蓋異數也進南京兵部尚書叅贊機務留守南都二十年深沉果斷每諭大議衆論盈庭徐以一言決之皆悅服卒謚忠襄

錢塘
縣志

按徐琦祖戍寧夏故琦在陝西中式實錢塘人也孫繼魯史稱雲南右衛人前志列之錢塘亦係戍籍仍載忠臣門況琦後奉命落戍籍則其復歸錢塘明矣

畢昌字裕後仁和人永樂乙未進士累官考功主事陞郎中歷官二十餘年清慎如一素有雅量人未嘗見其疾言

遽色遠近稱爲君子

舊志

夏時字以正錢塘人永樂十六年進士授戶科給事中洪熙改元議改鈔法時力言其擾無裨國用疏留中鈔果大阻民多犯禁議竟寢帝思時言命侍皇太子祀孝陵所過有災傷輒白太子發粟以賑宣德初一日三上封事稱旨命署尚寶司兼吏禮兵刑四科身親七篆無留事命覈浚湖黃冊陳便宜十四事邳徐濟寧臨清武清旱以時請遣官振之尋擢江西按察司僉事遷叅議奏卹民六事多議行以大臣薦超擢廣西左布政司前後所上又十餘疏雖不盡見用議者壯其敢言年未七十致仕歸卒爲人潔廉

好義親沒廬墓有異徵歿而鄉人祀之名其祠曰孝廉

明史

本傳

童真字守正仁和人永樂中拜監察御史巡按四川矢志忠勤務殫心力不求人知擢山東副使食正三品俸秩滿待次天官當事者諷求一見真不往托疾偃卧辭官歸識

者高之

四川通志

柴車字叔輿錢塘人永樂二年以舉人授兵部武選司主事歷員外郎八年帝北征從尚書方賓扈行還遷江西右叅議坐事左遷兵部郎中出知岳州府復入爲郎中宣德五年擢兵部侍郎明年山西巡按御史張昺言大同屯田

多爲豪右占據命車往按得田幾二千頃還之軍英宗初西鄙不靖以車廉幹命協贊甘肅軍務調軍給餉悉得事宜初朶兒只伯寇涼州副總兵劉廣喪師不以實聞顧飾功要賞車劾其罪械廣至京賜車金幣旌其直岷州土官后能冒功得陞賞車奏請加罪能復請命宥之車反覆論其不可曰詐冒如能者實繁有徒臣方次第按覈今宥能何以戢衆若無功得官則捐軀死敵者何以待之朝廷雖從能請然嘉車賢遣使勞賜之正統三年以破朶兒只伯功增俸一級在邊章數十上悉中時病同事多不悅車持議益堅嘗建言漠北降人朝廷留之京師雖厚爵賞其心

終異如長脫脫木兒者昔隨其長來歸未幾叛去今乃復來安知他日不再叛宜徙江南離其黨類事下兵部請處之河間德州帝報可後降者悉以此令從事稽覈屯田豪占者悉清出之得六百餘頃四年進兵部尚書參贊如故尋命兼理陝西屯田明年召還命與僉都御史曹翼歲更代出鎮及期病甚詔遣大理寺少卿程富代翼而命車歸治疾未及行六年六月卒車在江西時以採木入閩經廣信廣信守故人也餽蜜一罌發視之乃白金笑曰公不知故人矣却不受同事邊塞者多以宴樂爲豪舉車惡之遂斷酒肉其介特多類此

明史本傳

李約字孟博仁和人永樂甲申進士授兵部職方主事左遷交趾通判未幾復職歷九載陞廣東按察司僉事每行部審繫囚聽讞精明直枉立判多所平反調山東僉事復入爲兵部員外郎進郎中兩使朝鮮不抗不隨人謂得使命之體時西寇窺邊鄙陞陝西左叅政督餉事竣還朝有僞稱校尉求郡邑賂遺者約籍其贓械送入京事連塞北邊軍及京營衛士反誣約居職方時受遺容隱約嘆曰自弱冠受朝廷厚恩今已斑白何心復與健兒語耶遂投劾

歸

仁和縣志

鄒濟字汝舟餘杭人事母以孝聞博學強記尤長春秋爲

餘杭訓導累遷學錄助教以薦知平度州永樂初預修實錄除禮部郎中征安南從幕府司奏記還爲廣東右參政遷庶子授皇孫經濟爲人和易坦夷無貴賤皆樂親之進少詹事當是時宮僚多得罪被讒相繼下獄死濟積憂得疾皇太子書慰曰卿善自攝卽有不諱當提携卿息不使墜蓬蒿也卒年六十八贈太子少保謚文敏立祠墓側春

秋祀之

明史本傳

蔣暉字廷暉仁和人曾祖鑑仕元爲池陽掾民或以饑寒去爲盜主者欲盡寘于法鑑曰迫于饑寒故也力爭不得乃陳于轉運達于朝賴全活者三十二人暉自幼博學以

薦授中書舍人陞禮部郎中兼侍書致仕壽八十卒歷官四十餘年小心勤慎出入禁闥無過可指黃養正姚震有學行以累謫戍暉爲言于朝薦起用之皆躋顯仕子宏官

吏部郎中

仁和縣志

鄒幹字宗盛濟之子正統進士景帝初由兵部郎中超擢右侍郎以才爲于謙所倚也先入寇九門皆閉百姓避兵者號城下幹開門納之改禮部兼庶子考察山西官吏黜布政使以下五十餘人巡視河南鳳陽水災與王竑請賑又請令諸生輸粟入監讀書納粟入監自此始成化十二年賑畿內饑再遷禮部尚書加太子少保乞休卒謚康靖

明史鄒
濟傳

章文臨安人正統壬戌進士歷官至都御史建白甚多陞
南京禮部尚書掌太常寺事時景泰初立于謙劉定之輩
協謀定策文與有力焉少時曾代隣人手休書會僧夢神
告其事卽鬻已田贖所出婦以歸其夫文殆所謂善補過
者

臨安
縣志

夏時正字季爵仁和人正統十年進士除刑部主事景泰
六年以郎中錄囚福建出死罪六十餘人中有減死詔充
所在濱海衛軍者時正慮其入海島爲變轉發之山東然
後以聞因言凡福建減死囚俱宜戍之北方法司是其言

而請治違詔罪帝特宥之時正又言通番及劫盜諸獄以待會讞淹引時月囚多瘐死請令所司斷決詔從之且推行之天下天順初擢大理寺丞久之以便養遷南京大理少卿成化五年遷本寺卿明年春命巡視江西災傷除無名稅十餘萬石汰諸司冗役數萬奏罷不職吏二百餘人增築南昌濱江堤及豐城諸縣陂岸民賴其利嘗上奏不具齎奏人姓名吏科論其簡恣帝宥其罪錄彈章示之遂乞休歸僦居民舍布政使張瓚爲築西湖書院居之家食三十年近九十而卒時正雅好學閒居久多所著述于稽

古禮文事尤詳

明史本傳

倪謙字克讓錢塘人正統四年中進士第三人授編修景泰間備顧問多所啟沃天順初遷學士侍憲廟于春官己卯主順天試不錄柄臣子被誣構謫戍宣府者七年宣德初復職尋與子岳同日奉命入史局修英廟實錄進禮部侍郎轉南京禮部尚書卒贈太子少保謚文僖

錢塘縣志

姚哲字文明海寧人正統乙丑進士官監察御史出按湖湘大僚有不職者彈治不少貸時稱名御史卒以直取忌

左遷

海寧縣志

陳嘉猷字世用贛子餘姚人因父任遷家于杭景泰辛未進士授禮科給事中轉刑科兩使外夷堅辭不屈清風峻

節夷酋皆敬仰之陞通政使右通政居父喪極盡誠孝遂

卒

錢塘縣志

江玘字用良仁和人景泰辛未進士授禮科給事中嘗以六事疏陳悉關君德民務已而諫罷僧牒濫行疏救按察使陳璇冤又劾奏石亨怙寵罔上直聲赫然時李賢柄事衆爭趨其門獨玘不可曰吾爲諫臣可媚時宰以自託耶居諫垣十年出爲山東叅議又九載遷叅政未幾乞休以

子瀾貴贈大中大夫

浙江通志

何琮字文璧仁和人景泰甲戌進士授禮科給事中正色敢言多所封駁成化中進左通政掌司事承規矩廢弛之

後泣之以嚴宿弊頓革陞兵部左侍郎

兩浙名賢錄

金紳字縉卿錢塘人洪武初以閭右實京師遂家金陵之上元景泰癸酉中應天鄉試明年登進士第由庶常轉刑科給事中英廟復辟紳數召對憲宗嗣位進都給事中首率同列論都指揮門達竊弄威柄又言都御史王竑剛毅直諒可任大事宜卽召用悉納其言達遠謫起竑兵部尚書紳陞南京大理少卿剖決無滯雖老吏不能過嘗曰獄者人命所繫捶楚之下何求不得彼不能伸于法司而求伸于我我又不爲之理何用廷評爲故凡經紳平允者咸無異詞在大理九年如一日秩滿陞南京刑部右侍郎月

躬視獄者再戒飭其屬俾無法外施刑審錄重囚必對衆
言某可矜某可疑得生者甚衆戊戌江西荒上特簡紳往
視許便宜行事紳蒞部督責其屬勸興廢以賑江西十三
郡之民賴紳以活未幾得疾卒

錢塘縣志

項麒字文祥仁和人景泰七年由舉人授南京吏部司務
歷南京刑吏郎中憲宗登極詔求直言麒陳五事一曰務
正學二曰納諫諍三曰崇節義四曰遠近習五曰弭天變
其崇節義指李賢王翱當曹吉祥之變不能死義甘心屈
膝以圖苟免不知節義廉恥爲何物宜顯正典刑以訓在
位其遠近習指王振曹吉祥事以爲近戒宜收攬威福不

使任事語甚切直以病乞致仕家居三十年絕跡公府甘貧屢空以無疾終後巡按御史唐鳳儀以麒與王公琦褚公遂良同里表其里曰忠清附祀褚廟學使孔天引等別建揚清祠專祀麒琦

舊志

凌鎬字叔京新城人天順庚辰進士授南京刑部主事丁外艱改禮部在任五載不調或以進取說之鎬曰任郎署患勿稱敢他望耶性質直恥佞諛事或未善雖尊者前懇懇勿避以此多不合至其臨下未常以惡聲加也居官廉靖卒之日囊無遺資

舊志

倪岳字舜咨謙之子錢塘人天順甲申進士選庶吉士授

編修進侍讀直講經筵因文納蓋憲宗每屬目焉

舊志父謙

奉命祀北岳母夢緋衣神入室生岳遂以爲名岳好學文章敏捷博綜經世之務尚書耿裕方正持大體至禮文制度率待岳而決六年裕改吏部岳遂代爲尚書詔召國師領占竹於四川岳力諫帝不從給事中夏昂御史張禎等相繼爭之事竟寢時營造諸王府規制宏麗踰永樂宣德之舊岳請頒成式又以四方所報災異禮部於歲終類奏率爲具文乃詳次其月日博引經史徵應勸帝勤講學開言路寬賦役慎刑罰黜奸貪進忠直汰冗員停齋醮省營造止濫賞帝頗採納焉九年南京吏部缺加岳太子太保

往任之尋改岳南京兵部參贊機務還代屠瀟爲吏部尚書嚴絕請托不徇名譽銓政稱平岳狀貌魁岸風采嚴峻善斷大事每盈廷聚議決以片言聞者悅服同列中最推遜馬文升然論事未嘗苟同前後陳請百餘事軍國弊政剔抉無遺疏出人多傳錄之論西北用兵害尤切其畧云近歲毛里孩阿羅忽孛羅出亂加思蘭大爲邊患蓋緣河套之中水草甘肥易于屯牧故賊頻據彼地擁衆入掠諸將怯懦率嬰城自守苟或遇敵輒至挫衄旣莫敢折其前鋒又不能邀其歸路敵進獲重利退無後憂致兵烽不靖邊患靡寧命將徂征四年三舉絕無寸功或高卧而歸或

安行以返析圭擢爵優游朝行輦帛輿金充牣私室且軍
旅一動輒報捷音賜予濫施官秩輕授甚至妄殺平民謬
稱首級敵未敗北輒以奔遁爲辭功賞所加非私家子弟
卽權門廝養而什伍之卒轉餉之民則委骨荒城膏血野
草天怒人怨禍幾日深非細故也京營素號冗怯留鎮京
師猶恐未壯根本顧乃輕于出禦用褻天威臨陣輒奔反
隳邊軍之功爲敵人所侮且延綏邊也去京師遠宣府大
同亦邊也去京師近彼有門庭之喻此無陞楯之嚴可乎
頃兵部建議令宣府出兵五千大同出兵一萬併力以援
延綏而不慮其相去旣遠往返不逮人心苦于轉移馬力

疲于奔軼夫聲東擊西者賊寇之奸態也擣虛批亢者兵家之長策也精銳旣盡乎西老弱乃留于北萬一北或有警而西未可離首尾衝決遠近坐困其可爲得計哉至於延綏士馬屯集糧糗不貲乃以山西河南之民任飛芻轉粟之役徒步千里夫運而妻供父輓而子荷道路愁怨井落空虛幸而得至束芻百錢斗粟倍值不幸遇賊身且斃矣他尚何云輸將不足則有輕齎輕齎不足又有預徵水旱不可先知豐歉未能逆卜徵如何其可預也又令民輸芻粟補官而媚權貴私親故者或出空牒以授倉庾無升合之入至若輸粟給鹽則豪右請託率占虛名鬻之而商

賈費且倍蓰官爵日輕鹽法日沮而邊儲之不充如故也
又朝廷出帑藏給邊歲爲銀數十萬山西河南輸輕齎于
邊者歲不下數十萬銀日積而多則銀益賤粟日散而少
則粟益貴而不知者遂于養兵之中寓養狙之術或以茶
鹽或以銀布名爲準折糧價實則侵剋軍需故朝廷有糜
廩之虞軍士無果腹之樂至兵馬所經例須應付居平人
日米一升馬日芻一束追逐一日之間或一二堡或三四
城豈能俱給哉而典守者巧爲竊攘之謀凡所經歷悉有
開支罔上行私莫此爲甚及訪禦敵之策剗又論議紛紜
有謂復受降之故險守東勝之舊城使聲援交接犄角易

制夫欲復城河北卽須塞外屯兵出孤遠之軍涉荒漠之地輜重爲累饋餉惟艱彼或抄掠于前躡襲于後曠日持久軍食乏絕進不得城退不得歸一敗而聲威大損矣又有謂統十萬之衆裹半月之糧奮揚武威掃蕩窟穴使河套一空事非不善也然帝王之兵以全取勝孫吳之法以逸待勞今欲鼓勇前行窮搜遠擊乘危履險覬萬一之倖贏糧遠隨則重不及事提兵深入則孤不可援且其間地方千里無城郭之居委積之守彼或往來遷徙罷我馳驅我則情見勢屈爲敵所困旣失坐勝之機必蹈覆沒之轍其最無策者又欲棄延綏勿守使兵民息肩不知一民尺

土皆受之祖宗不可忽也向失東勝故今日之害萃于延綏而關陝震動今棄延綏則他日之害鍾于關陝而京師震動賊愈近而禍愈大矣因陳重將權增城堡廣斥埃募民壯去客兵明賞罰嚴間諜實屯田復邊漕數事時兵部方主用兵不能盡用也卒贈少保謚文毅明世父子官翰

林俱謚文自岳始

明史本傳

按明史岳上元人蓋岳之寄籍也省志選舉門岳父謙正統己未科施槃榜進士第三人錢塘人岳天順甲申科彭教榜進士錢塘人

江瀾字文淵仁和人成化戊戌進士選庶吉士歷陞學士

王德初陞詹事府少詹事晉吏部右侍郎守官勤慎嚴筦
鍵不通尺書著銓曹日錄以自檢雅不善逆瑾改南京禮
部尚書歷任三十餘年不治產業曰吾不欲以是上負先
德下累子孫也卒贈太子少保謚文昭

浙江通志

李旻字子陽錢塘人成化庚子鄉試第一甲辰廷試第一
授翰林修撰歷兩京國子祭酒明習典禮振舉師模仕至
南京吏部侍郎旻貳南太常時值孝陵水災遣朱輔代祭
幾紊儀等旻特疏于朝遂定兩京遣祭之儀

墓誌

俞琳字德彰臨安人成化丁未進士授監察御史按行畿
輔發奸擿伏貪橫斂迹正德戊辰陞禮部右侍郎改工部

畿輔諸郡饑盜且起上命兼右僉都御史往賑飭武備廣儲積未旬月諸郡安堵保定有張義官者潛結羣盜爲奸琳捕殺之盜遂息召陞工部尚書加太子少保致仕卒祀

鄉賢祠

兩浙名賢錄

陳珂字希白錢塘人宏治庚戌進士授刑部主事累官右副都御史巡撫河南適流賊餘黨孫郁等爲民梗首命兵勦平之仍命有司收瘞餘骸勒石表男女死節者又申冤獄知縣袁鎡等五十餘員俱奏請得末減新野當荆襄之衝內官私置抽分廠漁獵民檄守巡官毀之正德十年入

爲大理卿致仕

人物考

胡世寧字永清仁和人宏治六年進士性剛直不畏彊禦
且知兵除德安推官岐王初就藩從官驕世寧裁之他日
復請湖田持不可遷南京刑部主事應詔陳邊備十策復
上書極言時政闕失時孝宗已不豫猶領之再遷郎中與
李承勛魏校余祐善時稱南都四君子遷廣西太平知府
土酋德世寧歸所侵地母喪歸服闋赴京道滄州流寇攻
城急世寧卽馳入城畫防守計賊攻七日夜不能拔引去
再知寶慶府岷王及鎮守中官王潤皆嚴憚之遷江西副
使與都御史俞諫畫策禽盜討平王浩八以暇城廣昌南
豐新城當是時寧王宸濠驕橫有異志莫敢言世寧憤甚

正德九年三月上疏宸濠聞大怒列世寧罪徧賂權幸必殺世寧章下都察院右都御史李士實宸濠黨也與左都御史石玠等上言世寧狂率當治命未下宸濠奏復至指世寧爲妖言乃命錦衣官校逮捕世寧世寧已遷福建按察使取道還里宸濠遂誣世寧逃馳使令浙江巡按潘鵬執送江西鵬盡繫世寧家人索之急李承勛爲按察使保護之世寧乃亡命抵京師自投錦衣獄獄中三上書言宸濠逆狀卒不省繫歲餘乃謫戍瀋陽居四年宸濠果反世寧起戍中爲湖廣按察使尋擢右僉都御史巡撫四川道聞世宗卽位疏以司馬光仁明武三言進因薦魏校何瑋

邵銳可講官林俊楊一清劉忠林廷玉可輔弼知府劉蒞
徐鉦先爲諫官有直聲宜擢用時躉其言松潘所部熟番
將吏久不能制率輸貨以假道番殺官軍憚不敢詰官軍
殺番輒抵罪世寧陳方畧請選將益兵立賞罰格嚴隱匿
禁修烽堠時巡徼以振軍威通道路詔悉行之又劾罷副
總兵張傑中官趙欽甫兩月召爲吏部右侍郎未上以父
憂歸旣免喪召爲兵部左侍郎條戍邊時所見險塞利害
二十五事以上復陳用人二十事工匠趙奎等五十四人
以中官請悉授職世寧言賞過濫不納屢疏引疾改南京
吏部就遷工部尚書已復召爲左都御史加太子少保辭

官銜許之世寧故方嚴及掌憲務持大體條上憲綱十餘條末言近士習忌刻一遭譏毀則終身廢棄僉事彭祺發豪強罪受謗奪官諸如此者宜許大臣申理帝採其言惟祺報寢執政請禁私謁世寧曰臣官以察爲名人非接其貌聽其言無由悉其才行帝以爲然遂弗禁俄改刑部尚書每重獄別白爲帝言之帝輒感悟中官剛聰誣漕卒掠御服坐二千人世寧劾其妄已聰情得抵罪帝乃益信世寧王瓊修卻陳九疇將致之死以世寧救得戍兵部尚書王時中罷以世寧代加太子太保再辭不得命乃陳兵政十事曰定武畧崇憲職重將權增武備更賞罰馭土夷足

邊備絕弊源正謬誤惜人才所言多破常格帝優旨答之
居兵部三月求去帝不許免朝參世寧又上備邊三事固
稱疾篤乃聽乘傳歸給廩隸如制歸數月復起南京兵部
尚書固辭不拜九年秋卒贈少保謚端敏

明史本傳

徐潭字汝容錢塘人宏治癸丑進士歷官南京刑部郎中
秉公守法請託不行改工部郎中時工役繁興潭爲程其
出納會計詳慎乾沒者無所容奸陞湖廣叅議旋晉按察
司副使兵備辰沅豪貴陶倫罪當死以千金賂潭潭却之
持益急後其人賂代事者竟得縱而潭反被深文之名遂

罷歸囊橐蕭然

萬歷舊志

盛雲字民望餘杭人文辭純正學者宗之以進士任南京
刑部主事轉陝西司員外鞠獄詳明人無冤抑尋以父憂
家居遂養高不起

餘杭縣志

江曉字景熙仁和人正德戊辰進士歷兵部郎中改吏部
出爲山東叅政至官議召商上納隨時給估除前攬納侵
耗之弊遂著爲令陞山西右布政條陳體國便民六事悉
見施行擢應天府尹除奸釐弊節費勸農復條奏職掌十
事入爲工部右侍郎爲胡守中誣奏勒歸卒贈尙書

萬歷舊志

許相卿字伯台海寧人正德十二年進士世宗立授兵科
給事中宦官張銳張忠有罪論死帝復寬之給事中顧濟

疏爭帝下所司議卒欲寬其死相卿言天下望陛下爲孝
皇陛下奈何自處以正德帝議加興獻帝皇號相卿復爭
之嘉靖二年詔廢中官張欽義子李賢爲錦衣世襲指揮
相卿言于謙子冕止錦衣千戶王守仁子正憲止錦衣百
戶賢中官厮養反過之忠勛大臣裔曾不若近佞奴殉國
勤事之臣誰不解體部臣彭澤科臣許復禮安磐相繼言
之悉拒不納毋乃重內侍而輕士大夫哉尋復言天下政
權出于一則治二三則亂公卿大夫參議則治匪人潛干
則亂陛下繼統之初登用老成嘉納忠讜裁抑僥倖竄極
儉邪可謂明且剛矣曾未再期偏聽私昵秕政亟行明少

蔽剛少遜操權未得其術而陰伺旁竊者得居中制之如
崔文以左道罔上師保臺諫言之而不聽羅洪載守職逮
繫廷臣疏七十上而不行近又庇崔文奴奪法司之守斥
林俊以違旨怒言官之奏擾事涉中人曲降溫旨犯法不
罪請乞必從此與正德朝何異哉俊國之望也其去志決
矣俊去類俊者必不留陛下將與二三近習私人共理天
下乎今日天下與先朝異武宗時勢已阽危然元氣猶壯
調劑適宜可以立起何也承孝宗之澤也今日病雖稍蘇
而元氣已竭調劑無方將至不起何也承武宗之亂也伏
願深察亂機收還政柄取文輩置之重典然後務學親賢

去讒遠色延訪忠言深恤民隱務使官府一體上下一心而後天下可爲也同官趙漢等亦皆以文爲言帝卒不聽未幾以給事中李學曾章僑主事林應聰皆言事奪俸復上疏諫指帝氣驕志怠甘蹈過譽詞甚切爲給事三年所言皆不聽遂謝病歸八年詔養病三年以上不赴都者悉落職閒住相卿遂廢夏言故與同僚相善旣秉政招之謝弗應

明史本傳

相卿致仕後居紫雲山四十年

靜志居詩話

江暉字景孚仁和人正德丁丑進士選庶吉士與同館舒芬等抗疏力諫受杖幾斃謫廣德知州下車卽法其豪梗者以令于州省徭役減供應以身勸民民皆悅服二載以

編修召尋進修撰屬世宗簡侍從使更民事擢暉河南僉事未行疾作許歸卒

兩浙名賢錄

陸溥字原博錢塘人正德進士授職方司主事累官陝西叅政溥因事籌畫動中機要司馬卿倚如左右手疏奏皆屬焉劉瑾之誅也連坐者不下數千人溥白于上原之又覈京營諸兵馬素遮于豪右而懸其籍者溥乃盡括之世宗登極詔復先朝諍臣賜俸一級淦有負固者溥出奇兵掩擊之面縛數百人議以其地爲峽江縣赴陝西至靈寶卒年纔四十有五

錢塘縣志

邵經邦字仲德仁和人正德十六年進士授工部主事權

荊州稅甫三月稅額滿遂啟關任商舟往來進員外郎嘉
靖八年冬十月日有食之經邦時官刑部上疏曰茲者正
陽之月有日食之異質諸小雅十月之篇變象懸符說詩
者謂陰壯之甚由不用善人而其咎專歸皇父然則今之
調和變理者得無有皇父其人乎邇陛下納陸粲言命張
璉桂萼致仕尋以璉議禮有功復召輔政人言籍籍陛下
莫之恤也夫議禮與臨政不同議禮貴當臨政貴公正皇
考之徽稱以明父子之倫禮之當也雖排衆論任獨見而
不以爲偏若夫用人行政則當辨別忠邪審量才力與天
下之人共用之乃爲公耳今陛下以璉議禮有功不察其

人不揆其才而加大任似私議禮之臣也私議禮之臣是不以所議者爲公禮也夫禮唯至公乃可萬世不易設近於私則固可守也亦可變也陛下果以尊親之典爲至當而欲子孫世世守之乎則莫若于諸臣之進退一付諸至公優其賚予全其終始以答其議禮之功而博求海內碩德重望之賢以弼成正大光明之業則人心定天道順俾萬年之後廟號世宗子孫百世不遷顧不偉歟如徒加以非分之任使之履盈蹈滿犯天人之怒亦非聰等福也帝大怒立下鎮撫司拷訊獄上請送法司擬罪帝曰此非常犯不必下法司遂謫戍福建鎮海衛十六年皇子生大

赦惟經邦不在赦例經邦之戊所閉戶讀書居三十七年

卒隆慶初復官

明史本傳

徐江山字六橋正德辛巳進士官至尚寶卿性耿直敢言
夏言與曾銑受禍無敢白其寃者江山首上疏申救陶仲
文段朝用以方術得幸江山力辯其奸雖數觸上怒然心
知其不阿弗爲罪又馮恩繫獄中子行可刺血寫疏自縛
闕下江山力贊通政爲引奏得末減

錢塘縣志

柴祥字汝嘉仁和人嘉靖丙午舉于鄉以不忍違侍養越
再舉始赴禮部試丙辰成進士授中書舍人擢南京監察
御史遂請養母神宗新立蒐內外材咸以祥薦召補山東

道御史祥再疏力辭不許強起就職草三事列上一治河
一番南兵一嚴牙市俱切時政要領既報聞復拜疏言臣
違養六月母病倚枕呼臣日夕如在耳目臣不能爲子安
能爲臣上閔然許之數年母病歿禔除補江西道御史巡
按應天是時江南大胥祥特疏爲民請命詔予蠲恤爲政
大指務平恕而有所按劾不肯阿附以是失柄臣指方按
部未及代遽遷四川按察副使時尚書楊巍方獎恬退乃
移任福建且趣上道祥不得已往視屯鹽已攝按察使讞
獄多平反胥吏拱手奉公會巡按某浙東人持論稍不合
遂決計致仕

仁和縣志

童漢臣字仲良錢塘人嘉靖乙未進士江西道御史謫楚
藩都事聞父訃家居十年起廣東都事累遷泉州知府蕩
澎湖寇賜白金采幣陞江西副使以母老乞骸生平薦孝
好施皆人所難能舊志由魏縣知縣入爲御史寇大入宣府
大同總督樊繼祖等掩敗三以捷聞漢臣等劾之得罪其
按山西督諸將擊却俺荅之薄太原者會方劾嵩觸其怒
明年漢臣等與巡撫李珪覈上繼祖等失事狀章下吏部
漢臣前劾嵩並劾吏部尚書許讚讚亦憾漢臣因言漢臣
劾遲延宜並論嵩遂擬旨鏤珪一階留任謫漢臣湖廣布
政司都事舉朝皆知爲嵩所中莫能救也久之爲泉州知

府倭賊薄城有保障功

明史謝瑜傳

張瀚字子文嘉靖乙未進士釋褐授南京工部主事歷員外郎出知廬州府甫下車卽葺宋包肅公祠治廬一倣孝肅故事先教化而後刑罰其治大名也一以治廬者治之庚戌兵薄都門詔遣司馬郎一人持節徵四郡兵入衛瀚聞報以募召遊食饑附飽颺不可用披所屬編籍選丁壯二十之一得精銳八百人瀚首請使者閱師使者曰何速也比閱師則人人精銳絕出望外銓部察瀚兩郡循吏陞陝西按察使副使備兵潼關歲祿大發粟所活數十萬人累遷廣東四川福建叅政轉山西右轄尋除陝西左轄踰

年以都察院右副都御史出撫陝西瀚歟歷久熟諳西事
固原防秋期滿當撤戍瀚謂須冬防兵至乃撤不旬日吉
能蹂冰入犯防秋兵出擊之斬馘五十餘陞大理寺卿時
終南山饑民嘯聚當事者議勦瀚謂此屬迫于饑耳撤郡
丞單車諭之卽日解散入赴大理多所平反陞刑部右侍
郎改撫兩廣時嶺南寇賊充斥曾一本楊子亮等各擁衆
數千瀚悉平之新鄭入相起撫陝西尋陞南京右都御史
再進工部尚書時太宰楊襄毅病免廷議推擇三人殿瀚
名以聞上謂瀚聞望素著超次特簡毅然以正百僚爲已
任私交請謁一切謝絕務在崇實政遴真才一時銓路爲

之清肅上愈重瀚考績加太子少保

錢塘縣志

張居正遭父喪

謀奪情瀚心非之中旨令瀚諭留居正居正又自爲牘風瀚屬吏以覆旨請瀚佯不諭謂政府奔喪宜予殊典禮部事也何關吏部居正復令客說之不爲動乃傳旨責瀚久不奉詔無人臣禮廷臣惴恐交章留居正瀚獨不與居正怒嗾給事中王道成御史謝思啟撫他事劾之勒致仕居正歿帝頗念瀚詔有司給月廩年及八十特賜存問卒贈

太子少保謚恭懿

明史本傳

按錢塘縣志載瀚事而明史稱瀚仁和人省志選舉亦

稱仁和人

查秉燹字性甫海寧人嘉靖戊戌進士由黃州推官歷禮科給事中屬朝議莊敬太子冠服未知上意所指莫敢先發且憚繁節論如築舍秉燹斟酌古今折繁簡而中之疏上報可轉戶科數建白時事時吏多以苛忍爲能而侵漁滋甚上疏言國家以人心風俗爲紀綱以忠厚和平爲命脉有苛刻之監司則必有嚴刑之郡牧摧剝之令長狼鷲之吏胥習之移人賢者不免必詳議法守根極弊源因陳七弊其一日各任事權政體不一其二日苛於用法刑罰不中其三日稽查煩數吏弊日滋其四日罰贖違禁官箴日淪其五日征科無藝民命日殘其六日徭役不均生齒

日耗其七日供億過多重困民財海寧州志戶部尚書王杲下

獄戶科給事中屬汝進與同官海寧查秉燹馬平徐養正

巴縣劉起宗章邱劉祿合疏言兩淮副使張祿遣使入都

廣通結納如太常少卿嚴世蕃府丞胡奎等皆承賂受囑

有証世蕃竊弄父權嗜賄張談詞連倉場尚書王晞嵩上

書自理且求援于中官以激帝怒帝責其代杲解釋命廷

杖汝進八十餘六十竝謫雲南廣西典史秉燹由貴州推

官歷戶科左給事中數建白時事終順天府尹明史厲汝進傳

方廉字雙江新城人嘉靖辛丑進士授南康府推官徵爲

禮部主事歷陞右僉都御史巡撫江南抗疏直陳民間疾

苦得減賦百餘萬尋罷歸穆宗初起南京大理卿遷左副都御史總督漕運請留徐州商稅以佐河工罷如臯屯兵以蠲坐食歲計減省踰萬絮令爲常轉南京工部侍郎請

老歸

兩浙名賢錄

知松江府時倭寇攻上海廉晝夜捍禦一日

訛傳倭入西關人爭出走廉神色不動出坐西城樓使吏卒呼市民還俄頃遂定旣又請于臺使奏蠲賦稅練土著實行伍減客兵十七故被寇五年民猶得休息云

松江府志

朱瑞登字禾仲海寧人嘉靖辛丑成進士授桐城知縣遇歲歉倣古平準法令公私有無相濟瀕江多盜設法追捕良善安之甫一歲丁內艱服闋補任合肥擢御史時倭寇

不靖上二疏一定戰守策一議通海邑設重臣鎮之竝允
行出按居庸繕戍壘時聞諜屹若金城繼按湖廣屢平巨
寇及崇陽豪家俄以言事忤權相并哭楊椒山詩有秋月
照孤寢雖死却心安之句出爲安慶知府時興大工他郡
守有乞材于皖者力以下民疾苦上之事遂寢狼兵調回
掠道上追獲被俘子女數千屬他郡者歸之陞山西副使
備兵井陘爲忌者所詆歸

海寧
州志

沈淳字仲龐海寧人嘉靖癸丑進士授建寧推官有羅波
者坐死罪三十年不決淳立訊出之旁郡縣爭赴請理然
察吏不少貸墨吏某自揣不免乃鑄金人座子爲鰲山島

嶼形陰匿之與中淳微知之正色曰拂雲之樹寧假人恩
廁其下吏自免歸終不斥言其姓氏拜禮科累遷吏科都
給事中彈劾不避權貴語少傳袁煒少師楊漣曰國家大
計朝政是非惟諫官得言之宰相得行之嘗一疏黜大吏
二十餘人朝野竝震會有齟齬少保胡宗憲者擬詔獄舉
朝睨不發聲淳獨抗疏盛稱胡保障功以此大忤當國意
奔母喪歸奉父承歡二十年不應召

海寧
州志

董學字希顏海寧人嘉靖丙辰進士除行人擢御史大璫
強奪民居執法不爲屈出按宣大律將之失機者雖津要
勿顧飭武備兼葺邊學以廣聖化再按畿輔淳沁五河衝

決疏請毀隄置閘以疏上流會通河成漕艦不入衛河奏
罷艾家口陸驛遞費大名歲省鉅萬而衛源回隆諸隸河
南者亦賴以甦息又請減征徭均里甲清驛傳理狴犴皆
務大體比歿無以爲殮世稱廉御史

海寧
州志

孫枝字敬身錢塘人嘉靖己未進士授太常博士改戶科
給事中內艱起復取道江淮述所睹聞奏救災荒理河患
二疏又奏內使擾害光祿積弊辭甚剴切穆宗立遷刑科
左給事時沈鍊冤既白詔逮楊順路楷抵辟而守巡二道
王用中郭天俸相助爲羅織者冀倖免請于枝枝斷其罪
曰順宿爲嵩父子効命此兩人又効命于順楷法分首從

當誅朝野稱快勅遣中使三人董營事枝以宦寺典兵弊將百出力數其不可帝不悅詰大學士徐階對如枝言乃召三人還已復論大學士高拱專擅狀拱罷去進工科都給事外補山西叅政分守興寧落職歸

浙江通志

高儀字子象錢塘人嘉靖二十年進士選庶吉士授編修歷侍講學士掌南京翰林院召爲太常卿掌國子監事擢禮部右侍郎改吏部教習庶吉士四十五年代高拱爲禮部尚書穆宗卽位諸大典禮皆儀所酌定世宗遺命郊社及祔享祔葬諸禮悉稽祖制更定儀乃會廷臣議天地分祀不必改旣祭先農不當復祈穀西苑帝社帝稷睿宗明

堂配天與玉芝宮專祀當廢孝潔皇后當祔廟別祀孝烈于他所帝皆報可旣而中官李芳復請天地合祀如洪武制御史張楨請易皇極諸殿名盡復其舊儀皆持不可帝踐阼四月未召對大臣儀屢請隆慶二年正月饗太廟帝將遣代儀偕僚屬諫乃親祀如禮慶府輔國將軍縉熿請襲王爵儀執不從太子生七齡儀疏請出閣帝命待十齡行之詔取光祿銀二十萬兩儀力爭初世宗崇道教太常多濫員儀奏汰四十八人寺卿陳慶奏供事乏缺儀堅持不可掌禮部四年每歲暮類奏四方災異遇事秉禮循法居職甚稱引疾章六上卒見留會御史傳寵以先帝時撰

文叩壇事劾儀儀四疏求去乃加太子少保馳傳歸歸二
年用高拱薦命以故官侍東宮講讀掌詹事府六年四月
詔兼文淵閣大學士入閣辦事踰月帝崩預顧命及拱爲
張居正所逐儀已病太息而已未幾卒贈太子太保謚文
端儀性簡靜寡嗜慾室無妾媵舊廬燬于火終身假館于
人及沒幾無以殮

明史本傳

高時字世行臨安人以恩貢聯捷授翰林院庶吉士轉工
科給事中方翊國公郭勛勢焰薰灼舉朝憚之時盡發其
罪狀上始悟加俸一級遂正勛罪遷刑科都給事掌團營
丰裁益峻邑有海會寺僧衆且富強悍莫撓時疏其不法

奉詔燬之後以再劾嚴嵩父子被謫家居直聲彌震嵩敗

朝議起時大用會卒人甚惜之

明史本傳

金學會字子魯錢塘人隆慶戊辰進士授工部主事出榷
荊州關晉郎中治河張秋所至稱廉明甚著功績改禮部
督學湖廣張居正爲相著新令欲汰學官子弟首禁講學
學會拜命獨領舊勅所頒教約首令講學曰學不講則師
與弟子所崇何業荊州守以居正子入試宜居第一竟置
之後居正還按臣以下皆以屬員禮見學會獨長揖不拜
布衣何心隱死門人胡生者哭于市欲并置之法學會曰
殺人媚人吾不爲也立命出之奪情之事起以十揭上居

正居正不之省按臣朱璉阿居正意劾學會歸居正歿起爲福建按察使銓級爲僉事所司屯鹽爲立法閩人賴之遷江右兵備副使時歲歉饑民多揭竿稱亂巨室以擒勦請學會榜諸通衢曰朝廷恤饑民不恤亂民悉歸里甲以待賑濟否則以亂民論乃躬入里甲人授一籤勅吏裹糧負錢以從全活無算民大安他巡道欲駢斬亂民八十人學會曰民聚求食詎曰亂乎且誅八十人以聞上驚非常亦不許也乃止移湖廣布政司叅政晉僉都御史鎮撫福建萬歷中倭寇之亂南北驛騷學會乃治戎器具舟航策倭所出沒多在澎湖遂列戍以遏其衝倭出今急擊起用

宿將沈有容等專謀謀間倭遂有井子灣澎湖之捷歸功
裨將張萬紀朱某等疏言致倭寇者自曾一本吳平許光
朝等禍貽連省今賊首王少江等久住倭中若不及時撲
滅爲患滋甚且關白勢張近有取雞籠淡水之報澎湖一
役實足宣威窮島懾以先聲學會功在八閩以小嫌失直
指意竟有冒餉請覈之奏御史張應揚爲疏申理學會凡
五上疏請代始得歸天啟中賜祭葬入祠官一子

行狀

許子良字直夫仁和人隆慶二年進士授閩縣知縣治爲
天下第一召入授監察御史按河南歲祲奏賑貸木報以
便宜發各省倉庾諸司贖鍰行賑比命下而道殣已蘇改

按江西張居正密屬糾巡撫周某不應移疾歸居正卒以薦起巡撫貴州雲南姚關兵亂聲援恃貴陽子夏調兵進討斬首數百級改鎮鄖陽未至卒

古今圖書集成

沈楠字汝林仁和人隆慶戊辰進士授南昌府推官花園鄉故稱盜藪楠單騎詣賊皆面縛悔罪楠白于上官盡解縱之事聞賜金綺以卓異召爲監察御史張居正專政疏劾其黨殷正茂冒功不法又彈其持政撻切非所以輔少主居正銜之出按陝西以疾卒

浙江通志

阮子孝字舜予於潛人萬歷甲戌進士授建寧府推官屬邑故多黠猾子孝杜請託盡汰諸舞文吏崇安縣江某父

癩未死焚之賄吏幾脫子孝訊實伏法建陽縣有叔殺其姪匿其尸子孝假神道詞之得尸竈下遂抵罪壬午擢南京刑科給事中益慷慨勵風節皇子覃恩近習傳奉蔭其弟姪子孝抗言非祖制宜釐定貂璫震怖又追論江陵諸不法臺省摧阻之氣一伸條上優處建言諸臣鑒別言官心術等疏皆准行在南垣二年以病卒于任

於潛縣志

許聞造字長孺海寧人舉萬歷丙子鄉試授河間推官有能名內艱服闋補東昌拜貴州道御史建議風發再論日本朝鮮兵事李如松喪師失律而竟以粵援全歸劉綎受妬蒙讒而全以孤軍餌敵乞飭本兵石星勿以倭求貢市

苟且完事貽誤生靈又條上兵餉七事大憂二日武備空
虛漕糧偏重大計五日清額餉覈屯田濬溝洫定軍制嚴
軍法俱洞切時勢出按甘肅勘報西寧失事功罪無所假
借時礦使四出兩疏極諫又疏劾張侍郎養蒙諸臣竊權
樹黨政柄漸移忤旨責以沽名要譽謫判岢嵐州晉撫嘗
被劾及入謁頗被誚厲聲曰吾擊邪不勝固所甘也尋歸

里

海寧
州志

陳與相字卜野海寧人萬歷丁丑進士兩令江右寬平廉
敏權相命臺使屬與相偵其私憾及紀所親暱功狀輒兩
拒焉尋以上最徵或勸少通津要不答移刑部主事請恤

刑江南以便覲省久之終母喪出知成都府不受私謁蜀
有錦江清澹陳不解擔之謠嘗繩貴閹藩王謝過直指改
容擢川西道因有征播轉餉之調入關雄峻板角爲最其
輓運自龍泉諸路絡繹相接諸關以次下進逼海龍囤懸
崖鳥道矢石雨下躬擐甲胄督護凡數萬石以資士馬拓
地千里事平置遵義平越二府再任粵西左江道安南久
不來庭露檄陳大義責之受琛反賂遠人益服遷貴州參

政上疏乞歸

海寧
州志

陳禹謨字孟文號心抑仁和人萬歷丁丑進士授中書擢
監察御史巡鹽兩淮巡按江西所至以簡肅稱還京給事

中孟養浩以爭國本杖闕下禹謨疏力諫將并杖閣臣具
揭救得免請養里居十年起補巡漕陞太僕卿巡撫鄖陽
轉刑部侍郎卒于官贈刑部尚書

舊志

鍾化民字維新仁和人萬歷八年進士授惠安知縣多異
政御史安九域薦於朝以俸未及期移知樂平治復最徵
授御史與同官何卓王慎德交章請建儲不報出視陝西
茶馬言邊塞土寒獨畜馬爲業今慮其闌出爲厲禁于是
民間孳息與境內貿易俱廢公私緩急亦無所資請聽踰
境販鬻特不得入番中又曩寧夏乏餉歲發萬金易米二
萬七千石後所司乾沒濫征之民請以墾田粟補之永停

徵派俱報可巡按山東歲旱請蠲賑先發後聞坐寧夏時
取官銀交際爲尚寶丞周宏禴所劾調行人司正累遷儀
制郎中潘王珵堯由支庶嗣請封其庶子爲郡王化民待
不可帝傳諭曰第子虛名令藉是婚娶耳化民奏曰潘王
子與元子孰親王子不卽封慮妨婚娶元子不卽立不慮
妨豫教乎帝怒以化民辭直無以難帝命並封三王化民
與顧允成等面詰王錫爵于朝房尋進光祿丞二十二年
河南大饑人相食命化民兼河南道御史往賑荒政具舉
民大悅旣竣繪圖以進帝嘉之褒諭者再擢太常少卿二
十四年以右僉都御史巡撫河南討平南陽礦盜夾河賊

殲聚數千人復督兵破之時方采礦抗疏力諫化民短小
精悍多智計居官勤厲所至有聲徧歷八府延父老問疾
苦勞瘁卒官士民相率頌于朝詔贈右副都御史賜祠曰

忠惠

明史
本傳

祝以豳字耳劉海寧人萬歷丙戌進士知隨州入爲兵部
員外時關白攻朝鮮尙書石星力主招撫以豳曰日本勅
賊朝鮮屬國今以朝鮮急而遣招撫是棄朝鮮也東藩折
于日本勢必及我朝議是之已僉憲粵東清刷韶廠商料
儲爲軍需稅璫不敢撓其柄報最以終養居鄉十六年起
江西按察使請罷建武橋稅商民永利尋擢應天府尹進

工部左侍郎致仕

浙江通志

沈朝煥字伯含楠之子仁和人萬歷壬辰進士授工部主事時倭事孔亟上疏以相機遠襲對馬近襲釜山爲上策議和通市爲下策而終之以練土著墾屯田重武科用反間疏入不報尋命樞關荆南苛細悉捐民困大蘇轉職方員外陞武選郎中謝絕權貴鉗勒豪吏積弊肅清會有錦衣陳某以戚畹陳乞欲併軍功橐黃金爲壽朝煥揮去堅持不可忽傳中旨陳某准陞三級與世爵時夜半中官督促取覆朝煥具疏叅劾事遂寢諸不便之者中以考功法調外知靖州歷陞四川按察僉事福建布政叅議致仕歸

仁和縣志

沈光祚字延甫仁和人萬歷乙未進士授開封府推官歷順天府尹尚書孫慎行以紅丸事罪輔臣方從哲帝命諸臣集議光祚曰青宮之梃張差以風癲庇罪紅丸之藥李可灼以賚予爵功輔臣卽百喙何以自解人服其明確卒

贈工部侍郎

浙江通志

楊廷筠字作堅仁和人萬歷乙未進士授安福知縣擢御史巡太倉會中旨取太倉庫金三十五萬廷筠奏曰祖宗積貯至今尚存八百餘萬陛下御極以來支用七百餘萬今一旦又支若干脫有急需何以應之時礦稅之使四出

廷筠數以疏諫盡發陳奉馬堂陳增等奸狀出按江西以
三吳民重困榷稅上減榷疏遷按察副使請告歸以薦起

河南副使遷順天府丞會魏忠賢用事遂乞歸

浙江通志

葛寅亮字岷瞻錢塘人萬歷庚子浙江鄉試第一辛丑成
進士授南禮部儀制司主事遷祠祭司郎中疏請修拓黃
觀方孝儒等祠讀書講學尋起備兵九江解守令貪汚者
印綬使之去漑田平糶所活以萬計時稅監據湖口橫甚
擾民寅亮廉得不法事捕治不少貸稅監幾中以不測寅
亮終不顧創匡山書院以祀陽明尋乞休起福建副使濬
河開閘親爲指畫河成稱葛公河尋遷福建學政秉公矢

● 慎士論歸之陞尚寶卿典山西試歷通政使大理寺卿戶

部侍郎卒

錢塘縣志

諸允修字安所由餘姚徙仁和萬歷辛丑進士授襄城知縣入爲工部主事督理通惠河三遷雲南左布政寇迫郊外民擁門號哭求入議者不聽允修曰此吾赤子奈何以飽賊刃乎乃由別門先出精兵數十里外設伏衛之親坐城樓啟門令人所活數十萬天啟七年以南光祿卿致仕

舊志

沈朝華字季含楠第四子蚤孤夙慧甫四齡或指燈試之卽應聲曰以其昭昭使人昭昭萬歷癸卯領北解明年成

進士授工部主事進員外郎司九門衛會李太后合葬昭陵濬瀆以通水道賚白金陞郎中治河張秋悉弛井泉隄柳諸厲禁久之中讒去戊午起四川叅政備兵渝州有保障功天啟初擢江西按察使奢酋發難殺文武吏七十餘人距朝華去任兩月忌者不能釋中以考功法歸踰年復以廣東按察使出鎮雷陽陟秋猶瘴抵任纔五日卒李廷機在政府語人曰沈君渾金璞玉人欽其寶莫能名其器其相引重如此

仁和縣志

錢有聲字式韋錢塘人天啟辛酉貢于鄉官鴻臚丞長身玉立風度挺然每大朝會公卿多倚爲表式會魏忠賢攬

權族兄侍郎龍錫屢諷臺省交章不報旋引疾有聲毅然
曰兄大臣體應爾予未僚何憚斥言連詣登聞上疏皆留
中遂決策拂衣莊烈卽位詔起有聲充冊藩使賜一品服
晉秩鴻臚少卿歷海嶠還奏稱職尋黨局芬起有聲一無
所麗以母老乞歸

錢塘縣志

錢受益字謙之武肅後裔天啟甲子舉人乙丑進士選庶
吉士授翰林院檢討主湖廣試擢諭德歷詹事受益少自
修飭自讀書中秘後益醇謹簡默退朝之暇間取國家掌
故反復研究思勒成一書主楚試稱得人一夕入朝病不
能言同官吳太冲躬掖之出朝門輿歸抵舍而卒卒之日

家無餘財孤孱弱幾不能自立太冲爲草疏言官官受益
歷事兩朝最承隆遇孤身子立清廉自矢宜有帷蓋以慰

幽冥事聞贈禮部右侍郎

錢塘縣志

葛徵奇字無奇海寧人崇禎戊辰進士授中書舍人故事
中書不領解餉之役時晉寇方興獨毅然任之除湖廣道
御史巡視南城謂決責之下向無讞語不有確勘何以止
爭于是日決數十條民以無冤尋視長蘆鹽政捐羨錙一
十七萬有奇悉入正供巡按粵廣首嚴通洋之禁除積盜
平紅澳南順保昌瓊崖間素苦浮賦奏悉蠲豁薦起陳子
壯何吾騶黃士俊輩部議格于成例人咸惜之以太僕進

光祿卿聞賊猖獗日甚徵奇憂事勢必至傾覆乃請立闕
第于留都不報嗣奉對品調南之旨遂歸

海寧
州志

吳太冲字默寔錢塘人崇禎辛未進士選庶吉士授檢討
太冲以詞臣侃侃直言如理財則請嚴加派弭盜則請重
撫綏剪亂則請專勦滅而尤以正人心敦士行破門戶全
國體爲急辛巳枚卜閣臣召對諸臣于平臺太冲獨以國
家力疲宜安插饑虛重選循卓爲言帝置筆不動顧太冲
且前太冲跪奏曰臣之所陳似迂然國家至今日如病羸
瘵不特消伐元氣迅利肝膈之劑不可用卽驟服參苓效
亦不可旦夕期也帝默然量移南國子監司業尋轉右春

坊右中允以外艱歸

浙江通志

王世德錢塘人崇禎間雲南巡撫清慎自矢除弊懲奸一

切政務必親爲理以勞瘁卒于官

雲南通志

杭州府志卷八十一終